



CONVENIO DE COLABORACIÓN ENTRE A CONSELLERÍA DO MAR DA XUNTA DE GALICIA E A CONFRARÍA DE PESCADORES “LA ANUNCIADA” DE BAIONA PARA A MELLORA DA ACCESIBILIDADE AO ESPAZO PARA A DIVULGACIÓN E POSTA EN VALOR DA CULTURA MARIÑEIRA NA LONXA DE BAIONA MEDIANTE UN SISTEMA DE ATENCIÓN DESASISTIDO

Santiago de Compostela,

REÚNENSE

Dona **Susana Rodríguez Carballo**, Directora Xeral de Desenvolvemento Pesqueiro da Consellería do Mar (en diante CM), actuando en exercicio da competencia que ten delegada en virtude do disposto na Orde do 8 de setembro de 2017 de delegación de competencias na Secretaría Xeral Técnica da Consellería do Mar, nas direccións xerais e xefaturas territoriais e na Presidencia do Consello de Administración do ente público Portos de Galicia (DOG núm. 180, de 21.09.2017).

Doutra parte, **Dona Susana González Álvarez**, patroa maior da confraría de Pescadores “La Anunciada” de Baiona, con NIF G36618510 e con domicilio en rúa Alférez Barreiro nº 22, 2ª planta. 36300 Baiona (Pontevedra), que segundo a información que consta no Tomo II, Libro 8, Volume 1 tomou posesión do seu cargo como patroa maior o 26 de outubro de 2018, con poderes suficientes para a celebración deste acto en virtude do establecido no artigo 36 do Decreto 8/2014, do 16 de xaneiro, polo que se regulan as confrarías de pescadores de Galicia e as súas federacións (DOG núm. 19, de 29.01.2014).

EXPOÑEN:

-Que a Consellería do Mar ten entre as súas competencias as relativas a innovación, a investigación mariña e as relativas a divulgación e transferencia tecnolóxica sobre o mar e a pesca, que executa tanto a través dos seus propios recursos e programas como en colaboración con outras entidades, apoiando as accións que coinciden cos obxectivos da Consellería.

-Que a Consellería a través da Dirección Xeral de Desenvolvemento Pesqueiro, participa coma beneficiario do proxecto Ecodestin_3in, dentro do cal ten encomendada a execución dunha acción piloto para mellorar a accesibilidade ao espazo para a divulgación e a posta en valor da cultura mariñeira mediante un monumento singular desasistido.

-Que para executar esta acción piloto, de mellora da accesibilidade e a interpretación nun monumento singular desasistido, seleccionouse a instalación da lonxa de Baiona, coma un espazo onde ofrecer unha interpretación sobre a cultura mariña.





- Que a confraría de pescadores “La Anunciada” de Baiona é unha corporación de dereito público, dotada de personalidade xurídica e capacidade de obrar para o cumprimento dos fins e o exercicio das funcións que lles están encomendadas, que actúan como órganos de consulta e colaboración coa Administración na promoción do sector pesqueiro e representan intereses económicos e corporativos dos profesionais do sector.
- Que a confraría de pescadores “La Anunciada” de Baiona xestiona, en réxime de concesión administrativa, a lonxa de Baiona e está interesada en prestar apoio na execución deste proxecto Ecodestin_3in, en concreto, na actuación que trata de converter a lonxa de Baiona nun monumento á cultura marítima desta localidade e para dar servizo como un espazo para a divulgación, adquisición de coñecementos e posta en valor da cultura mariñeira de Baiona.
- Que as confrarías de pescadores (coma concesionarios das lonxas) poden realizar actividades de turismo mariñeiro orientadas á valorización e difusión do seu traballo no medio mariño, así coma os costumes, tradicións, patrimonio e cultura mariñeira; tal e coma se establece no art. 112 da Lei 11/2008, de 3 de decembro, de pesca de Galicia (DOG núm. 243, de 16.12.2008). Estas actividades consideraranse coma complementarias ás actividades propias do colectivo de profesionais do mar.
- Que os días dedicados polas persoas mariscadoras ao turismo mariñeiro computan para a renovación das habilitacións para o exercicio do marisqueo sempre que a dita actividade se contemple no plan de xestión aprobado tal e coma se establece na disposición adicional segunda do Decreto 153/2019, de 21 de novembro, polo que se regula o réxime de conservación e explotación dos recursos marisqueiros e das algas (DOG núm. 233, de 09.12.2019).
- Que ambas as partes consideran de interese a colaboración na actuacións obxecto deste convenio porque contribúen de forma clara a acadar os obxectivos do proxecto Ecodestin_3in contribuíndo á valorización do patrimonio cultural e natural, tanto material coma inmaterial, ao desenvolvemento do turismo costeiro e a promoción internacional de Galicia e da Eurorexión como destino náutico e natural de costa e de interior ao promover a lonxa de Baiona coma monumento desasistido.
- Que por todo o exposto e dada a concorrencia de intereses e obxectivos comúns e as especificidades que concorren, faise necesario acudir á figura do convenio de colaboración regulado no artigo 14 da Lei 14/2013 de racionalización do sector público autonómico e nos artigos 47 e ss da Lei 40/2015, de 1 de outubro de Réxime Xurídico do Sector Público.

ESTIPULACIÓNS:

PRIMEIRA. - Obxecto do convenio.

Este convenio ten por obxecto establecer as bases polas que se rexerá a colaboración entre a Consellería do





Mar, a través da Dirección Xeral de Desenvolvemento Pesqueiro, e a confraría de pescadores “La Anunciada” de Baiona para levar a cabo a mellora da accesibilidade e a interpretación co obxecto de converter a lonxa de Baiona nun espazo para a divulgación, a adquisición de coñecementos e a posta en valor da cultura marítima desta localidade e a súa xestión, mediante un sistema de atención desasistido, por parte da confraría de pescadores “La Anunciada” de Baiona, de conformidade co establecido no presente convenio.

Para levar a cabo esta actuación a CM dotará dos elementos necesarios para converter a lonxa de Baiona nun monumento accesible, o que inclúe:

- a instalación na lonxa do equipamento necesario para que o visitante, a través do código QR que recibe ao facer a reserva, poida entrar e activar o sistema *port lock* ao que están conectados os diferentes elementos interpretativos (smart TV, Totem).
- a instalación de una smart TV, un Totem, de sete carteis informativos e a dotación á zona de instalación dunha iluminación axeitada; a sinalización dos espazos expositivos.
- a instalación dunha placa informativa no exterior da lonxa.
- a instalación dun sistema de videovixilancia con dúas cámaras e un cartel informativo sobre a gravación de imaxes.

Polo presente convenio, esta dirección xeral cede a xestión dos elementos anteriormente citados á confraría de pescadores, a cal, manterá os ditos elementos de mellora da accesibilidade e a interpretación, e xestionará o funcionamento do sistema de atención desasistido da lonxa de Baiona.

SEGUNDA. - Obrigas da Consellería do Mar.

A Consellería do Mar, a través da Dirección Xeral de Desenvolvemento Pesqueiro, comprométese a:

- Instalar, na lonxa de Baiona, os elementos de interpretación necesarios para convertela nun espazo para a divulgación, a adquisición de coñecementos e a posta en valor da cultura marítima desta localidade.
- Instalar os elementos necesarios para implantar un sistema de atención desasistido na lonxa de Baiona.
- Instalar un sistema de videovixilancia con fin de garantir a seguridade tanto das persoas e coma dos bens da propia lonxa.
- Financiar o mantemento dos sistemas anteriormente mencionados e o incremento dos custos na que incorra a confraría mediante achegas anuais durante a vixencia do convenio.
- O apoio e asesoramento técnico en relación coas actuacións deste convenio.





TERCEIRA. - Obrigas da confraría de Pescadores “La Anunciada” de Baiona.

As actuacións a levar a cabo pola confraría de pescadores “La Anunciada” de Baiona, a través deste convenio, no espazo da Lonxa de Baiona son:

1. Mantemento e xestión do sistema de atención desasistido da lonxa de Baiona.
2. Mantemento e xestión dos elementos instalados para a mellora da accesibilidade e a interpretación na lonxa de Baiona.
3. Mantemento e xestión do sistema de seguridade, o que inclúe xestión do ficheiro de imaxes e o cumprimento das obrigas establecidas na normativa de protección de datos.
4. Ter en vigor un seguro de responsabilidade civil que cubra os danos producidos a terceiros no interior da lonxa e un seguro de danos que cubra os elementos instalados.

CUARTA. - Dirección dos traballos.

A Confraría de Pescadores “La Anunciada” designa á Patroa Maior para realizar a dirección e seguimento da execución das actuacións enumeradas na estipulación primeira do presente convenio.

Por parte da Consellería do Mar, a dirección e o seguimento realizarase polo xefe/a do Servizo de Desenvolvemento Pesqueiro e o persoal técnico que se designe.

QUINTA. - Presentación de informes.

Os responsables da confraría de pescadores informarán ao responsable da CM da marcha das actividades previstas no convenio mediante a emisión dun informe anual da actividade. O correspondente informe anual será presentado non máis tarde do 15 de decembro de cada ano.

No informe anual indícaranse o número de visitantes recibidos, de ser posible desagregados por sexos e idades (ao obxecto do seguimento do indicador de produtividade establecido no proxecto Ecodestin 3IN), ademais das incidencias ocorridas durante ese período de tempo.

O informe virá acompañado dunha memoria económica coa xustificación dos gastos incorridos nese período.

SEXTA. – Financiamento.

A Consellería do Mar, a través da Dirección Xeral de Desenvolvemento Pesqueiro, colaborará na realización das actuacións citadas na estipulación primeira do presente convenio cunha achega de vinte mil cincocentos oitenta e cinco euros (20.585,00 €) que se financiarán con cargo á partida orzamentaria 15. 03. 722A.640.8 (c.p. 2017 00103) dos orzamentos xerais da Comunidade Autónoma de Galicia para os anos





2020- 2023 distribuídos do seguinte xeito: 2020: 1.085,00 €; 2021: 6.500,00 €; 2022: 6.500,00 € e 2023: 6.500,00 €.

O importe deste convenio será aboado pola Consellería do Mar a confraría mediante transferencias á conta ES096 2080 5015 6030 4001 4794, trala entrega por parte da confraría de pescadores da documentación que figura na Cláusula Sétima.

SÉTIMA. - Xustificación e pago.

O importe que a consellería achegará ten como destino a compensación dos custos nos que incorre a Confraría de Pescadores La Anunciada, polo que non existe ánimo de lucro por parte desta última.

Este importe terá coma destino compensar os gastos relativos ao mantemento dos equipos, o das pólizas de seguros, persoal e os gastos derivados das obrigas de desinfección e limpeza.

A confraría entregará xustificación documental dos gastos realizados baixo este convenio mediante as correspondentes facturas, nóminas e/ou certificados.

A data limite de entrega da memoria será o 15 de decembro de cada ano.

O pagamento anual farase trala entrega por parte da Confraría do informe da actividade realizada e a memoria económica correspondente a cada período de xustificación.

OITAVA. - Da responsabilidade en materia de protección de datos derivadas da gravación de imaxes polas cámaras de seguridade.

A instalación dun sistemas de videovixilancia na lonxa co fin preservar a seguridade tanto das persoas e os bens como a da propia instalación, leva consigo o cumprimento por parte da confraría do establecido no art. 22 da Ley Orgánica 3/2018, de 5 de diciembre, de Protección de datos persoais e garantía dos dereitos dixitais (BOE núm. 294, de 06.12.2018), respecto ao tratamento de imaxes captadas por cámaras de videovixilancia.

A xestión deses datos persoais poderá realizarse de forma directa ou indirecta, mediante contrato con empresa especializada.

NOVENA. - Comisión de seguimento.

Para a supervisión deste convenio crearase unha comisión paritaria que coordinará o seu desenvolvemento, planificación e cumprimento. Esta comisión estará constituída polo/a director/a xeral de Desenvolvemento Pesqueiro, ou persoa que o/a substitúa, e un membro do Servizo de Desenvolvemento Pesqueiro en representación da Consellería do Mar, e pola patroa maior da confraría de pescadores La Anunciada de Baiona, ou a persoa que a substitúa, e outro membro da Confraría de Pescadores “La Anunciada”, en





representación da citada entidade.

Esta comisión, que estará presidida polo/a Director/a Xeral de Desenvolvemento Pesqueiro ou persoa que o/a substitúa, coordinará o seu desenvolvemento e estará facultada para resolver cantas dúbidas xurdan na súa execución. Os acordos adoptados neste senso serán inmediatamente executivos.

DÉCIMA. – Vixencia.

Este convenio estará vixente dende a data da súa sinatura ata o 31 de decembro de 2023.

Non obstante, este convenio poderá extinguirse por acordo mutuo e voluntario das partes, por desistencia dalgunha ou por denuncia por incumprimento dos compromisos adquiridos, o que se comunicará de xeito fidedigno, despois de audiencia da outra parte e cun mes de adianto como mínimo.

Non obstante, se o desenvolvemento do convenio fose satisfactorio por ambas partes, as partes poderán formular adendas ao presente convenio, corrixindo ou prorrogando a súa vixencia antes de que chegue a data do seu remate. A súa vixencia pode prorrogarse como máximo por un período de tres anos.

DÉCIMO PRIMEIRA. - Responsabilidade das actuacións.

A sinatura do convenio non implica relación laboral, contractual ou de calquera outro tipo entre os profesionais e outro persoal que vaian a desenvolver as actividades previstas e a Consellería do Mar, de tal maneira que a esta non se lle pode esixir ningunha responsabilidade —nin directa, nin indirecta, nin subsidiaria— polos actos ou feitos acaecidos no desenvolvemento do convenio.

DÉCIMO SEGUNDA. - Resolución do convenio.

As partes poderán modificar o convenio antes da data de remate da súa vixencia, sempre que sexa de mutuo acordo, ou denunciar o convenio en calquera momento.

Será causa de resolución do convenio o incumprimento, reiterado e manifesto, das obrigas de cada unha das partes que comunicará formalmente á outra.

DÉCIMO TERCEIRA. - Normativa aplicable y xurisdición.

Este convenio ten carácter administrativo e os seus efectos rexeranse polo establecido nas súas estipulacións, e quedará suxeito ao disposto nos artigos 47 e seguintes da Lei 40/2015, de 1 de outubro, do réxime xurídico do sector público.

A posible discrepancia na aplicación e interpretación deste convenio resolverase por diálogo directo entre as partes ou o resolverá a Comisión de Seguimento prevista na estipulación Novena.





A Xurisdición contencioso-administrativa será a competente para dirimir as cuestións que puidesen xurdir na aplicación deste convenio.

DÉCIMO CUARTA. - Transparencia e bo goberno.

Consonte ao establecido nos artigos 12 a 16 da Lei 19/2013, de 9 de decembro, de transparencia, acceso á información pública e bo goberno en concordancia cos artigos 24 e 25 da Lei 1/2016, do 18 de xaneiro, de transparencia e bo goberno, os asinantes outorgan o seu consentimento para que os datos persoais que constan no convenio e mais no resto das especificacións contidas no mesmo poidan ser publicadas no Portal de Transparencia e Goberno Aberto.

En proba de conformidade cos termos deste convenio, as partes comparecentes asinan o presente convenio no lugar e data mencionados.

Pola Confraría de Pescadores “La Anunciada”
A Patrona Maior
Dña. Susana González Álvarez
(asinado electronicamente)

Pola Consellería do Mar
A Directora Xeral de Desenvolvemento Pesqueiro
Dña. Susana Rodríguez Carballo
(asinado electronicamente)

